


MPE KUBANDA NTANGU YINA

 Kieleka ya kele mbote na kuvutuka mpe kuwa mpangi-bakala, pasteur, kupesa kimbangi ya lemvo ya Nzambi, na mwa mwana ya yandi ya kento. Ya kele kaka Mfumu Yesu, na kusala bima mutindu yina. Ya kele kieleka.

² Ntangu yayi, beto ke na kiese mingi, na nkokila yayi, samu na kuvwanda na beto, mosi ya banzenza ya beto awa, mutindu beto ke bokilaka yawu, lukutakanu ya bisambu na nkokila ya Mvula ya Malu-malu, nkundi ya munu ya mbote, Mpangi Ernie Fandler, mosi ya bandimi na Mfumu Yesu Klisto, trophée ya lemvo. Na kisina yandi kele muntu ya Suisse, yandi me katuka kuna. Mpe mu ke kwikila, ya kele na mpangi-bakala mosi na yandi kuna, yina ba ke zingaka na yandi na Shawano ntangu yayi, ya dikanda ya ba-Allemand, Mpangi Waters. Beto kele na kyese na kuzwa bawu na kati ya beto na nkokila yayi.

³ Na yina beto kele, diaka, na kati ya beto na nkokila yayi, mpangi-bakala ya ntalu ya lukwikilu, ya Afrique du Sud, Mpangi David duPlessis. Beto kele na kyese na kuzwa yandi na kati ya beto, diaka. Mpe beto kele, David na munu, ke—ke vingila, ke sambila, Mfumu, na kupesa beto kisalu mosi ya nene kintwadi, samu na mvula yayi ke kwisa, na Afrique mpe na bitini yankaka na yinza. Mpangi David kele awa ntangu yayi samu na kuzonzila yawu, mpe kusambila samu na yawu, kubanda ntangu yayi tii na Kilumbu ya ntete, samu na kubaka lukanu ntangu mpe kisika, beto ke kwenda na—na Afrique, mpe bitini yankaka ya yinza. Mutindu, Mpangi David me vwanda na kisalu ya kulutula nene na Lukutakanu ya ba-Pentecotiste ya Yinza ya muvimba, mpe me zabana diaka na bantwadisi ya nene ya nsambulu na yinza ya muvimba. Mpe yandi me zabana mingi na kundimisaka mpe kuyangidika, na kisika beto kele ntangu yayi, samu na kusadisa Nzutu ya Yesu Klisto kintwadi, ya balukwikilu nionso ya ba-denomination. Ata nionso yina (bawu) dibuundu bawu kele na yawu, to yina (bawu) kidimbu bawu kele na yawu. Ya kele, Dibuundu, Yina Klisto kufwilaka.

⁴ Mpe mu ke banzaka yawu bambala mingi. Mu vwandaka sadisa na kuvukisa bitwisi, bambala mingi, kuna na Weste. Beto vwandaka mata, Mpangi David, mpe beto ke vwanda kuna sika wapi bawu ke nata bitwisi na lupangu ya baniama, tii na bamongo, samu na kupesa bawu madia na . . . samu na kunata bawu na lupangu ya matiti, . . . ya ya mfinda. Na ntangu, matiti vwandaka kukula kuna na nsi, matiti ya nseke. Na manima ba vwandaka zenga matiti yayi, mpe vwandaka kudisa bitwisi na ntangu—na ntangu nionso ya hiver, ntangu bawu vwandaka na kitembo ya mvula-mpembe, kuna na bamongo.

⁵ Mpe mu vwandaka vwanda kuna na zulu ya kiti mpe vwandaka tala mukengi ya mfinda vwandaka lutisa bitwisi; mpe konso ferme, kuna na nsi, yina lendaka basisa tonne mosi ya matiti. Kana bawu lenda basisa ba-tonne makumi tanu ya matiti, yina zola tuba ti bawu lenda tula bitwisi makumi tanu. Kana bawu lendaka basisa funda mosi ya tonne ya matiti, funda mosi ya yintu ya bitwisi lendaka luta kuna. Bakala nionso, vwandaka tula kidimbu na zulu ya bangombe ya yandi. Bawu vwandaka tala mbote bidimbu, ya kieleka, ba-ferme ya mutindu na mutindu, na yina bawu lendaka ve kuvukisa bawu. Mpe na yina ntangu. . .

⁶ Mukengi ya mfinda, yandi vwandaka landila mingi ve mutindu ya bidimbu yina vwandaka kuluta kuna, samu ti ya vwandaka na mitindu nyonso ya bidimbu. Kasi ya vwandaka na kima mosi yina yandi vwandaka tala mbote, ya vwandaka kidimbu ya menga. Ba zolaka vwanda na kidimbu ya Hereford, to ba zolaka kota ve na mwelo. Ba vwandaka vutula bawu. Beno me mona?

⁷ Mpe mu banza ti ya ke vwanda mutindu yina na Lufundusu. Ya ke vwanda ve na kidimbu ya mutindu yina beto ke lwata, kasi kana kidimbu ya Menga kele kuna. Yawu yina kima yina—yina ke vwanda na mfunu, kidimbu ya Menga.

Mpe mu ke na kiese mingi na kuvwanda na Mpangi David na kati ya beto.

⁸ Mpe mu ke mona Mpangi Estle Beeler vwandaka awa na mwa ntangu fioti me luta. Mu monaka yandi me telema kuna na manima, kisika mosi kuna. Mpe balongi yankaka yina beto zola kuwa, na nkokila yayi. Mpe, na yina, mpe mu banza ti Mpangi Ruddell mpe bayankaka ke kwisa, samu ba ke vwanda tii na kati-kati ya mpimpa.

⁹ Ata mutindu yina, Mpangi David lenda ve kuvwanda tii na kati-kati ya mpimpa. Yandi kele bakala yina ba ke zolaka mingi, kisika nyonso. Mpe na ntangu Mpangi Rogers kuwaka ti yandi vwandaka awa, na yina, yandi ke fidisa ba bokila yandi samu na kuvwanda kuna na ngunga ya kumi na mpimpa. Na yina ya zola kutuba ti yandi ke katuka awa, ntama mingi ve, samu na kukwenda kuna na Louisville.

¹⁰ Mpe mu banzaka ti ya ke vwanda mbote, kana ya ke vwanda mbote mingi na Mpangi David, kana—kana beto ke bokila yandi mpe kutuba yina kele na ntima ya yandi, kulonga samu na beto, kusala nionso yina Mfumu me tula. Beto nionso ke zola kuwa Mpangi David duPlessis, ya Afrique du Sud.

¹¹ Bika mu tuba yayi. Ti, ntangu mu vwandaka kuna, kuna na Afrique, na campagne ya munu ya nene Mfumu me pesa beto kuna, mpangi ya yandi ya bakala vwandaka mutendudi ya munu, Mpangi Justus. Mu ke kwikila ti nkumbu ya yandi kele Mpangi Justus. Mpe dibuta ya kitoko mingi ya bantu, kele bampangi

yayi duPlessis. Mu banza ti ya kele. . . Mu banza ti bawu nionso kele balongi, landila mutindu mu zaba, mpe mu banza ti tata ya bawu, mpe, vwandaka longi. Mpe bawu kele ya dibuta mosi ya bantu ya mbote. Mpe Mpangi David me zabana mingi na kati-kati ya mabuundu nionso mpe ba denomination na yinza ya muvimba.

¹² Mpe Mpangi David, mu zola ti nge kwisa ntangu yayi mpe nge tuba na beto, to nionso yina Nzambi me tula na ntima ya nge samu na kutuba. Kwisa. Mpe mu ke na kiese mingi na kutalisa nge na dibuundu ya munu, na nkokila yayi. Yayi kele Mpangi Orman Neville, pasteur ya beto. Mpe samu na dibuundu, yayi kele mosi ya bankundi ya munu ya ntalu, mpe—mpe binwani mvita ya Nzambi, Mpangi David duPlessis ya Afrique du Sud. Nzambi sakumuna nge, Mpangi David.

¹³ [Mpangi David duPlessis ke na kuzonzaka. Kisika ya mpamba na bande—Mu.] . . . zonga. Amen. Beto nyonso me sala. Mpangi David, sala nswalu na kuvutuka mpe vwanda na beto dyaka. Ya kele kieleka mbote. Beto kele na kyese mingi.

¹⁴ Mpangi David tubaka mwa bima kuna, mu zola ti mu baka kilapi ya munu, mu lenda sonika yawu. Kasi mu ke bambuka ntangu nionso “batekolo ya babakala; batekolo.”

¹⁵ Mbote, ya kieleka beto ke sepela na kutala ya mpangi ya beto ya bakala. Mpe yandi kele. . . vwandaka. . . kintwadi na bakwikidi ya Lukutakanu ya Yinza ya muvimba ya Pentecote, mpe muntu ya nene na ndonga ya kisalu ya yandi na yinza ya muvimba. Mpe beto ke na siansi, na nkokila yayi, samu na kuzwa Mpangi David yina ke kwiza zonga na beto na nkokila ya mpimpa ya Malu-malu yayi. Mpe beno lenda mona yina bantu ya nene ke banzaka samu na Mfumu ya beto, kubanza na kisadi ya Yandi ya nene.

¹⁶ Ntangu yayi mu ke kwikila ti, mbasi, na kuvwandaka Mvula ya Malu-malu, ya me bikana kaka bangunga fyoti ntangu yayi. Mpe mu fwana kwenda na suka-suka, na yina mu banzaka ti mu ke tuba fioti, kana ya kele mbote mingi na Mpangi Neville. [Mpangi Neville me tuba, “Yinga. Amen.”—Mu.] Mpangi Beeler, mpe balongi yankaka awa. Mu ke baka ntangu mingi ve. Mpe mu banza, kana beto ke tuba “Amen,” mpe ke kwenda na yinzo, ya ke vwanda nsangu mosi ya kitoko. Mpe beto lendaka vutula matondo na Mfumu samu na yina beto me kuzwa awa, na nkokila yayi.

¹⁷ Mpe ntangu yayi, kasi yayi kele mpimpa ya Mvula ya Malu-malu, beto ke yangidika mosi na yankaka, na nzila ya Kimfumu ya Nzambi, na kulongaka, tii ya ke kuma Mvula ya Malu-malu. Mpe mu fwana. . . kumata na suka, na suka-suka, na ntwala ya kilumbu. Mpe mu kele ve ntwenya mutindu David. Mu banza ti mu. . . Mu banza ti mu ke kuwaka ve ntwenya mutindu yandi. Yandi kele. . . Ya kieleka, David kele mwa—mwa fioti ya kukula

kulutila munu. Mu banza ti yandi kele na bamvula sambwadi to nana, ya lendaka vwanda kumi. Kasi kieleka yandi kele mulaka ya tiya samu na Nzambi, ke na kusalaka nzietolo ya ba-kilometre mafunda makumi nana na bankama yiya makumi sambanu na tanu na mvula yayi, samu na Kimfumu ya Nzambi. Yandi kele na nzila ya yandi ntangu yayi samu na kukwenda kulonga na kisika ya Mpangi Rodgers, mpe mbasi samu na kuvwanda na muntu yankaka, kisika yankaka, mpe kisika yankaka, mpe kisika yankaka, mpe kuvutuka diaka awa na Kilumbu ya ntefe. Mpe mu fwana kutana na yandi samu na kukubika mbote-mbote nzietolo ya yinza ya muvimba ntangu mingi ve.

¹⁸ Mpe beto ke vwanda na Afrika, mu me bakula na manima ya midi yayi, na Ngonda ya tatu, Ngonda ya tatu yayi—yayi ke na kwiza. Mu ke kutana na Clayton Sondmore, ya Kimvuka ya Bantu ya Mumbongo ya Baklisto ya Nsangu ya mbote ya Muvimba, sabala yayi, to sabala yina ke kwisa, kitini ya ntete ya yawu, mpe kukubika samu na Jamaïque, na Haiti. Mu ke kwenda na sabala ke kwisa na Kentucky, to mu ke kwenda kuna na Georgie, mu ke vwanda na balukutakanu kuna. Mu me vutuka mpe mu ke kwenda na Kentucky, nkokila mosi awa, mpe nkokila mosi kuna, samu na kukuma na mabuundu yayi. Mpe kuna mu ke vutuka mbala mosi na yinzo, mpe mu ke kwenda na—na—na Atlantic City, samu na kubanda na kilumbu ya 27, tii na kilumbu ya 30, mpe kukatuka kuna na suka ya kilumbu ya 1, mpe kubanda na—na Kingston, na Jamaïque, na kila- . . . na kilanga ya mbangu, na nkokila yina, samu na bilumbu kumi ya balukutakanu kuna. Mpe kubanda kuna, na manima kuna na Haiti, mpe bisika nionso. Beto zaba ve kisika ya kukwenda, kaka mutindu Mfumu ke twadisa beto.

¹⁹ Ntangu yayi, nionso yayi ke na kuyilama. Beno me mona? Mu me tuba yinga ve. David kele awa, Clayt ke na kwisa. Gordon, Mpangi Gordon Lindsay ke na kwiza, samu na Amerika ya Sude. Mpe—mpe bayankaka, Bantu ya Mumbongo ya Baklisto samu na Amerique-Latine. Mpe Mpangi David kele samu na Suisse, Allemagne, kuna. Kasi beto me zaba ntete ve. Beno landila na kusambila. Mu zola kwenda kisika mosi ve tii kuna Nzambi ke tuba kwenda, mpe ya kele kulutila mbote na luzabu ya munu. Na yina, kana mu me twadisama na kukwenda, na yina ntangu mu ke basika na avion, mu . . . Mpe mu ke kipe ve yina ke telemina beto, mu lenda tuba, “Mu me kwisa na Nkumbu ya Mfumu Yesu.”

²⁰ Mu ke vutula matondo samu na David, kimpangi yina beto vwandaka na yawu kintwadi, samu bakala yayi kele bakala ya mfunu mingi, kasi yandi—yandi—yandi—ke kwikilaka kieleka ministere yayi ya Mfumu. Ya kieleka yandi ke kwikila yawu. Mpe—mpe bankumbu ya beto me vukana kintwadi na yinza ya muvimba ntangu yayi, Mpangi David na munu.

²¹ Mpe mu ke na kiese mingi na kuvwanda na kimvuka na bakala ya mutindu yayi. Kasi, bankundi, mu ke sepela na yawu. Kasi kima ya kulutila nene yina mu lenda banza kuvwanda na ngwisani kele Yesu Klisto, Mwana ya Nzambi, Yandi yina kele ya nene.

²² Ntangu yayi, Mpangi Neville mpe bayankaka ya bawu ke longi na mwa ntangu fioti, kasi mu zola kutanga kaka mwa kima mosi na Masonuku ntangu yayi.

²³ Mpe ya kele mbote, mu banza, na mpimpa ya Mvula ya Malu-malu, kumona milongi ya mutindu na mutindu, mpe mutindu bawu ke pusana na dilongi mosi, mpe yina bawu ke tuba, mpe nionso yina. Mpe konso muntu ke na mutindu ya yandi mosi ya kulonga. Beno zaba, Nzambi salaka beto nionso mutindu mosi ve. Yandi salaka beto ya kuswaswana. Yandi salaka beto ya kuswaswana na ntela ya beto. Yandi salaka yinza ya kuswaswana, mpe bamongo ya nene, bamongo ya fioti, matiti, bantoto ya kuyuma, bafelele ya nene ya mpembe, bafelele ya bleu, mpe ya mutindu nionso. Yandi ke salaka beto kaka ya kuswaswana. Yimeni. Yandi ke salaka yintu ya mbwaki, mpe bayintu ya ndombe, bayintu ya tinta ya café, yintu ya mpembe; ya nene, ya fioti, ya yinda, oh, na nionso yankaka dyaka. Beno me mona? Yandi ke—Yandi ke salaka beto kaka ya kuswaswana. Nzambi kele Nzambi ya mutindu na mutindu. Mpe mu ke zolaka mutindu yina. Beno ve? [Dibuundu me tuba, “Amen.”—Mu.] Kasi kaka kima mutindu mosi ntangu nionso? Oh! Oh! Mu zola yayi.

²⁴ Na yina beto baka ntangu yayi Masonuku ya beto, kuna na Buku ya Santu Matthieu, Nsangu ya mbote ya Santu Matthieu, kubanda na . . . Mpe nzila ya 4, mu zola kutanga samu na . . . kutanga samu na beto dilongi, Mfumu kusadisa beto. Santu Matthieu, kapu 4.

Mu banza, ntete beto tanga, beto sambila.

²⁵ Tata ya Mazulu yina me fuluka na lemvo, ya kele diaka na bantima yina ke vutula matondo beto ke pusana na mvula yayi ya malu-malu. Mpe beto ke pusana na Nge mpe beto ke nata na Nge basouci ya beto yina me luta, mpe ke lomba ti Nge ke tula yawu na nzadi ya kuzimbana, mpe ke bambuka dyaka ve masumu ya beto. Mpe bika ti beto tala ve ngwisani ya beto ya kimpeve, kasi na kati ya beto. . . bika ti beto tala ngwisani ya beto na Nge. Mpe lemvo kila beto masumu ya beto nionso. Mpe beto ke lomba ti Mpeve ya Nge ke sala na beto na nkokila yayi. Mpe kana ya kele na kima ya mvindu na kati ya beto, Mfumu, nata yawu ntama mutindu kele esete na weste. Losa yawu na mubu ya kuzimbana, samu na kubambuka yawu dyaka ve na zulu ya beto, ti beto lenda kota na mvula yayi ya malu-malu, kukondwa mvindu, ya kusukula na Menga ya Mwana-dimeme, mpe ya kukubama.

26 Bika ti mvula yayi 1960 kuvwanda mvula ya kulutula nene mutindu beto me sadilaka Nge ntete ve. Pesa beto mingi, ya kulutula nene. Balukutakanu yayi nionso ke kwisa na ntwala, Mfumu, yina beto ke banza na Mpangi duPlessis, mpe na yinza ya muvimba, na Asie, mpe kuna na Europe, mpe bisika nionso—nionso. Mfumu, bika ya vwanda luzolo ya Nge mpe Ngolo ya Nge yina ke twadisa bima yayi. Mpe kana na konso ntangu yina beto lendaka basika na nzila ya Nge ya Kinzambi yina me kubama, bika ti Mpeve-Santu kukanga beto nzila mpe kukanga beto, Mfumu, mpe vutula beto na kisika ya mbote. Pesa yawu.

27 Sakumuna mwa dibuundu yayi, Mfumu. Pene, pene-pene ya bamvula makumi tatu, mu banza, ya me telama awa ntangu yayi, mutindu lubambuku ya lemvo ya Nzambi, samu na bantu ya kukikulumusasa. Beto ke sambila, Tata, ti Nge ke sakumuna Mpangi Neville, pasteur. Sakumuna dibuundu ya muvimba. Sakumuna ba-administrateur, ba-diacre, ntwadisi ya bankunga, pianiste, mpe bandimi nionso, muntu nionso, milongisi ya lukolo ya Lumingu, nionso yankaka. Mfumu, bika ti beto vwanda na kiyeka ya kukula na mvula yayi na lemvo ya Nzambi. Mpe bika ti bandimi ya beto kukula na lutangu ya nene, mpe—mpe kuzwa diaka lemvo ya Nge, ti, kulutula yayi me vwanda na bamvula me luta. Pesa yawu, Tata.

28 Ntangu yayi sadisa beto na yina beto ke belama na dilongi yayi yina beto zola kutanga, Ndinga ya Nge. Mpe kaka Nge, Mfumu, lenda tendula mpe beto ke sambila ti Nge ke pesa yawu na beto, samu na zola ya Kimfumu ya Nzambi. Na Nkumbu ya Yesu Klisto. Amen.

29 Mu ke zabisa ntangu yayi yina mu me soola samu na dilongi na mwa ntangu fioti. Ya kele na kati ya Masonuku awa, mpe mu ke tanga yawu. Yintu ya dilongi ya yawu, mu zola bokila yawu mutindu yayi, “kubanda ntangu yina.”

30 Mu banzaka ve, mu tubaka na nkokila yina, mu banzaka ve ti mu ke kwisa, samu ti laka ya munu vwandaka kuma ya kukangama. Mpe kento ya munu tubaka na munu mazono, to kilumbu mosi na ntwala, yandi tubaka, “Na yina mu banza ti nge ke kwenda ve na yinzo-Nzambi.”

31 Mpe mu tubaka, “Cherie, mu ke banza mutindu yina ve. Laka ya munu ke ya kulemba mingi mpe ya kukangama.”

32 Mpe na yawu, kaka na nkokila yina, ntangu mu vwandaka mpe bakaka Masonuku, mu kwendaka mbangu na Yayi.

33 Mpangi Sothmann kwizaka. Yandi tubaka, “Nge ke kwenda na yinzo-Nzambi mbasi na nkokila?”

Mu tubaka, “Yinga. Mu ke vwanda kuna.”

34 Mpe Meda talaka munu, mpe yandi tubaka, “Mu ke bakula nge ve.”

Mu tubaka, “Mu ke vingila ve ti nge bakula munu, nge me mona,” mu tubaka, “to muntu yankaka ve.”

³⁵ Muntu ve yina me twadisama na Mpeve ya Nzambi ba lenda ve kubakula yandi.

³⁶ Mfumu ya beto, ba lendaka ve kubakula Yandi. Yandi vwandaka mutindu Yandi vwandaka tuba mbala mosi, minuti mosi; mpe mutindu yankaka, muniti yankaka. Mpe kisika yankaka Yandi vwandaka tubila kima yankaka. Ntangu yankaka ya vwandaka Yesu vwandaka zonza, bantangu yankaka ya vwandaka Nzambi vwandaka zonza. Beno me mona? Mpe bilandi tubaka kuna, na nsuka, bawu tubaka, “Tala, ntangu yayi Nge me tuba pwelele. Ntangu yayi beto me bakula.” Beno me mona?

³⁷ Mpe Yesu tubaka, “Nge me ba- . . . Mpe beno me kwikila ntangu yayi?” Beno me mona, na manima ya yina.

³⁸ Beno lenda kaka ve kubakula yawu, samu ti beno me twadisama na Mpeve. Mpe beno ke banda na kusala kima mosi, beno ke mona ti, beno me mona, beno kele. . . Nzambi zola kusadila beno kisika yankaka. Beno fwana telama *awa* mpe kukwenda *awa*, kaka ya kutwadisama na Mpeve. Ba kele bantu ya ngitukulu, bantu ya mutindu yankaka yina ke na luzingu yina bawu zola kupesa na Nzambi.

³⁹ Mpe na yina mu ke tubaka ntangu nyonso yayi, “Mu ke sala yayi kana Mfumu zola.” Beno me mona? Kana mu sala nsilulu na muntu nyonso, “Mu ke sala yawu kana Mfumu zola.” Beno me mona? Mpe na yina, kuna, kana ya kele ve luzolo ya Mfumu, mu ke vwanda. . . Mu ke zonzila Nsangu yayi kana Mfumu zola. Yandi lendaka pesa munu mbokolo, kaka na Nsangu yayi, samu na kukwenda na Californie. Mu ke tula nionso na lweka mpe mu ke kwenda na Californie, na nswalu nionso.

⁴⁰ Mpe mu zola zinga mutindu yina. Mu ke zola ve kima mosi ke kanga munu. Mu ke na mfunu ya kima ya nene ve to yankaka, yina kele na ntalu ya ba million ya ba dollars, mpe beno fwana kuzwa mbongo mingi, konso kilumbu, yina ke kanga munu. Mu zola vwanda, kisika yina, ntangu Nzambi ke tuba, “Mu zola ti nge kwenda awa na bantu yayi. Bawu kele kaka tanu. Kasi kwenda kuna, mpe vwanda kuna tii Mu ke tuba na nge na kukwenda.” Mu zola kwenda kuna. Mu kele ve ya kukangama, kaka. . . mpe kana Yandi zola ti mu kwenda na bayinsi ya nzenza.

⁴¹ Ntangu yayi, beto me zonzila, samu na kukwenda na Allemagne, to na—na Afrique. Mpe kento mosi yina kele na mafuku ya mbongo, kaka ntangu yina Mpeve tulaka yawu na zulu ya munu na kukwenda na Afrique, yandi tubaka, “Mu ke simbisa nzyetolo mpe mu ke futa nionso samu na yawu.” Beno me mona? Yawu yina kaka. Samu na yinki mu ke kukiyangisa samu na mbongo mpe bima nionso yina, ntangu Tata ya munu kele na

yawu nionso? Beno me mona? Yandi lenda tuba kaka na bakala yayi ya mvwama, to muntu yina ya mvwama, to bantu yayi, to bantu yina, mpe mu ke vwanda ve na boma samu na yawu. Beno me mona? Nzambi ke talaka yawu nionso.

⁴² Mpangi Roy, yina ke mutindu ya kuzinga. Beno bika kaka Yandi kukeba yawu. Ya ke mbote mingi.

⁴³ Ntangu yayi beto baka Masonuku ya beto, na kapu 4. Mpe beto banda na—na kutanga, na nzila ya 12 ya kapu 4 ya Nsangu ya mbote landila Santu Matthieu.

Ntangu yayi ntangu Yesu vwandaka . . . Mpe ntangu yayi ntangu Yesu kuwaka ti ba losaka Jean na boloko, yandi kwendaka na Galilée;

. . . katukaka na Nazareth, yandi kwisaka mpe zingaka na Capernaüm, yina kele pene-pene ya mubu, na kizunga ya Zabulon na Nephtali:

Ti ya lendaka salama yina profete zonzaka na Esaie profete, na kutubaka,

Yinsi ya Zabulon, mpe yinsi ya Nephtali, pene-pene ya kizunga ya mubu, na simu ya Jourdain, Galilée ya Bantu ya makanda;

Bantu yina vwandaka na mpimpa monaka nsemo ya nene; mpe bayina me vwanda na bizunga ya kivudi ya lufwa nsemo me basika.

Kubanda ntangu yina Yesu bandaka na kulunga, mpe kutuba, Beno balula ntima: samu kimfumu ya mazulu me kuma pene-pene.

⁴⁴ Mu zola tubila dilongi yayi: *Mpe Kubanda Ntangu Yina*. Beno zaba, mutindu muntu, beto nionso ke banzaka bima yayi na mwa ntangu mosi. Kima yayi mpe yina me salama, mpe kubanda ntangu yina. Mpe ntangu yayi, bambala mingi, beno ke kutana na kiboba ya bakala to kiboba ya kento, mpe bawu ke zolaka kuzonzila ntangu yina kima mosi salamaka, ti bawu lenda talisa yawu na mutindu ya kuswaswana mpe kutuba, “Ya vwandaka na ntangu yina.”

⁴⁵ Ntangu yayi, mu banza kaka ti mingi na kati ya beto awa, na nkokila yayi, beto lendaka bambuka moyo, beto lendaka bambuka moyo na bima yina me salama na ntangu mosi kuna. Kubanda ntangu yina, kima mosi sobaka. Kima *yayi mpe yina*, yawu salamaka na ntangu yina. Mpe kubanda ntangu yina, ya vwandaka ya kuswaswana. Mpe ya kele kima ya mbote yina beto lenda sala. Mpe ndambu ya balubambuku yina, bima yina beto ke banza, kele bima ya kulunga yina me sobaka. Mpe ya kele na bima yina kele ve ya kulunga na kubanza.

⁴⁶ Mumbandu, kana kento ya luzingu ya yimbi, ti yandi tuba, “Ya vwandaka na ntangu yina mu vwandaka mbote, ya kusungama, mwana ya kento ya luzitu. Mpe na nkokila mosi, to

na kisika mosi, kima mosi salamaka.” Mpe kubanda ntangu yina, yandi vwandaka na nzila ya yimbi. Luzingu ya yandi me beba na disumu, mpe mpimpa mpe mudidi, mpe kaka lufundusu ke vingila yandi. Kasi yandi lenda bambuka moyo, kubanda ntangu yina, ya salamaka ntangu yandi bakaka nzila ya yimbi.

47 Bakala yayi ya kulawuka malafu, na nkokila yayi, na babala-bala, yina ke meka na kunwa malafu samu na kukatula mawa ya yandi. Beno lenda lokota yandi. Mutindu mu vwandaka na bowery awa, mwa ntangu fioti me luta, na New York, kisika ya nene ya bantu ya kulawuka malafu. Mu vwandaka tambula na longi mosi. Mpe kuna vwandaka me lala bakala mosi, oh, kaka bantu mingi, ya kukondwa kikesa, ya kulemba, yina me lala kuna na bilele ya bawu nionso ya kupola na ntwala, mpe—mpe mandefo ya bawu nionso na zulu ya bizizi ya bawu, kaka na kati ya mpasi. Mpe bawu vwandaka kaka ya kukondwa kikesa.

48 Mpe longi yayi tubaka, “Lokota muntu yina, mpe yufula yandi kiuvu.”

49 Mpe mu kwendaka kuna na bakala yina vwandaka ya kulala kuna na dikulu mosi na zulu ya pare-choc ya ditoma, mpe yintu ya yandi ya kutanda na bala-bala, mpe kisika yina yandi vwandaka ve na lenda ya ku—ku—kukwenda na kinkoso, na konso ntangu yina. Oh, yandi vwandaka kaka na kati ya mpasi. Mpe mu simbaka yandi, mpe mu tubaka, “Nge lenda tuba?” Mpe yandi vwandaka ve kupesa munu mvutu.

50 Na yina longi yango fukamaka. Yandi zabaka mingi wapi mutindu kusolula na yandi. Mpe yandi yufulaka yandi, “Nani nge kele?”

51 Mpe na nsuka yandi kumaka na kuvumbula yandi, tii kuna yandi tubaka, “Kana nge ke sumbila munu malafu!” Mpe beto bakulaka ti, yandi lendaka talisa musapi ya yandi na banke yina yandi vwandaka ntwadisi ya yawu.

52 “Mbote,” yandi tubaka, “beto kele milongi. Nge lenda tuba na munu yinki salamaka?”

“Kana nge ke sila na kupesa munu malafu!”

53 Mbote, beto lenda sala yawu ve. Mu tubaka, “Mu lenda ve kubwela mawa na mawa ya nge. Mu zola kusadisa nge.”

54 Disolo ya yandi nyonso. Yandi vutukaka na yinzo, nkokila mosi, mpe kuna vwandaka, yina yandi bokilaka, “Ya Luzolo Jean” mukanda na zulu ya mesa. Na yina, kento ya yandi bikaka yandi. Mpe kuzwaka . . . Yandi zolaka kento ya yandi. Mpe kento bakaka bana ya yandi. Mpe yandi kufwaka makwela, mpe yandi kwelaka bakala yankaka. Mpe yandi tubaka, “Mu zabaka ve yinki kusala, kubula munduki na yintu ya munu, to yinki kusala. Na yina mu—mu kwendaka na nganda.” Mpe kubanda ntangu yina, yandi vwandaka kuna. Ya ke salama mutindu yina na yinza.

55 Muntu ya luvunu. Kana beno baka mosi, mutindu mu tubaka na bakala mosi, kilumbu mosi, yina mu banza ti vwandaka tuba mambu ya buzoba. Mpe bakulaka, ti, yandi tubaka luvunu mingi tii kuna yandi kwikilaka yawu, yandi mosi. Mpe mu tubaka, “Yinki ke sala ti nge sala mutindu yina?” Mpe mu vwandaka samu na kusolula na yandi. Mu tubaka, “Mu zola kuyufula nge. Masolo yina kele ya mpamba-mpamba samu bantu kukwikila.”

56 Yandi tubaka, “Ya ntete yina mu lenda bambuka moyo na kutuba,” yandi tubaka, “Mu vwandaka mwana-bakala ya fioti yina ba me sansa na yinzo ya mbote.” Mpe yandi tubaka, “Mu basikaka mpe nwaka makaya ya mandefu ya masangu, samu na kuvwanda na mayele mingi. Mpe mu kudiaka mwa café, samu na kukatula nsunga ya yawu na yinwa ya munu.” Mpe yandi tubaka, “Mu salaka yawu kuna na manima ya cheminée ya ntama, na manima ya yinzo.” Mpe yandi tubaka, “Ata fioti ve mu ke zimbana yawu, ntangu mama kangaka munu kuna, mpe tubaka na munu, ‘Mwana, bika mu kuwa nsunga ya yinwa ya nge.’ Mpe mu fulaka mupepe ya munu na kizizi ya yandi, mpe yandi tubaka, ‘Nge me kudia café samu na kukatula nsunga na yinwa ya nge. Yinki nge vwandaka sala? Nge vwandaka kunwa makaya?’”

57 Mpe yandi tubaka, “Kima mosi tubaka na munu na kutuba na yandi kieleka.” Yandi tubaka, “Kasi mu tubaka, ‘Ve, mama. Mu ke zenga ndefi. Mu me kunwa ve makaya.’” Yandi tubaka, “Mpe kubanda ntangu yina, yawu bandaka.”

58 Beto lenda mona kima yina—yina bandaka na ntangu mosi. Mpe kubanda ntangu yina, mambu sobaka. Mpe ya kele na bima yankaka ya kulunga yina beto lenda banza. Bantu yina vwandaka na makani ya mbote me meka na kubanda bima ya malu-malu, kubanda na kusala bima na ntangu yina.

59 Mumbandu, ntangu lotiliki monanaka na mbala ya ntete na Benjamin Franklin, mpe bawu vwandaka na kiyeka ya kununga yawu. Bawu bandaka na kutuba, “Kubanda ntangu yayi, ya ke vwanda diaka na bamvita ve. Samu ti, kana, ba lendaka tula lotiliki yayi na bikaku, na ngolo ya kulutila mingi, ti ata muntu mosi ve lendaka zabuka yawu.” Bawu vwandaka na makani ya mbote.

60 Mpe kaka na manima ya Mvita ya Ntete ya Yinza ya muvimba, ntangu—ntangu Kaiser Wilhelm ndimaka ngwisani ya ngemba. Ba tubaka na beto awa na Amerika. Mu vwandaka mwana ya bakala pene ya bamvula yivwa. Kasi mu lenda bambuka moyo bantu nionso vwandaka tuba, “Beto ke vwanda diaka ve na mvita yankaka. Kubanda ntangu yayi, yawu me kumana, kukonda nsuka.” Kasi beto kuzwaka mvita yankaka.

61 Mpe ntangu O.N.U. ya nene. To, mu zolaka tuba, na ntwala ya yina, bawu salaka yina ba vwandaka bokila Kimvuka ya Bayinsi. Mpe bawu tubaka, “Ntangu yayi beto ke vwanda diaka

na bamvita ve, samu beto kele na Kimvuka ya Bayinsi yina ke sala kisalu ya lukengolo na yinza ya muvimba. Mpe kana ya kele na kudasuka kisika mosi kuna, bantu yayi ke basika na bayinsi nyonso ke kwenda kuna mpe ke sala pulusu na yinza ya muvimba.” Kasi yawu vwandaka kubwa. Bawu landilaka kaka na kuvwanda na bamvita. Mpe O.N.U. ke kuma mutindu mosi.

⁶² Ba me tuba na beto ntangu yayi na kuzabisa na ntwala ti mbasi na nkokila to na Lumingu na nkokila . . . Bakala yina mosi zabisaka na ntwala Pearl Harbor, na ntangu ya kieleka yina ba-avion ke bula yawu bombi, yandi tubaka, ti, “Lumingu na nkokila na ngunga kumi na zole, ti makumi sambwadi na tanu na zulu ya nkama ya bantu ya Amerique ke kuma mbombi, ti Russie ke bula bombi na Etats-Unis, na nkokila ya Lumingu ke kwisa na ngunga ya kumi na zole.” Bakala mosi yina zabisaka na ntwala Pearl Harbor. Ba ke zabisaka yawu ve, samu bantu ke vwalangana. Mu ke kwikila yawu ve. Beno me mona? Ve. Samu, ya lenda ve kukanga ntima na mvita ya ba-atome. Mosi ya bawu me luta kibaka ya muningu, mutindu *yayi*, beto ke losa bawu mutindu *yina*, mpe yinza ke panzana. Kima mosi fwana salama, ntete, na ntwala Yesu ke kwisa. Ya kieleka.

⁶³ Mutindu, bankwelani ya bantwenya. Ya vwandaka na ntangu mosi yina bawu kwelaka. Mpe bawu—bawu tulaka bansilulu ya bawu kintwadi. Mpe bawu zengaka ndefi, mosi na yankaka, kwikama ya bawu. Mpe bawu tubaka, ti, “Beto ke zolana, ke pesana lukumu mpe ke zolana mosi na yankaka, ntangu nionso beto ke zinga.” Kasi ya me kwiza ntangu yina kima mosi salamaka.

⁶⁴ Bima yayi nionso, ya—ya kele na ntangu kima mosi ke salama. Mpe mu banza ti bansilulu nionso ya bawu, mpe bimvuka nionso ya bayinsi, mpe nionso yina, mu banza ba vwandaka na makani ya mbote, kasi bawu nionso me kuma na nsuka. Nionso me kubwa, na nsi ya makulu ya muntu. Na makani nionso ya mbote beto lendaka kuzwa, kasi nionso fwana kuma na nsuka.

⁶⁵ Kasi ya kele na ntangu yina muntu lenda kwiza na kima yina kele ya Kukonda nsuka. Ya kele ntangu yina, muntu, ntangu muntu ke kutana na Nzambi. Ya kele ntangu yina kima mosi ke salama yina kele ya Kukonda nsuka.

⁶⁶ Beto ke salaka banzimbani. Mpe beto ke salaka bansilulu ya beto na nkokila ya Mvula ya Malu-malu, samu na kubuka yawu kilumbu yina ke kwisa. Beto ke balula ba-page ya malu-malu, mpe beto ke pesa bansilulu. Mpe beto ke kwenda na banganga-Nzambi mpe . . . Beto ve, kasi bantu ya Katolika ke salaka yawu. Mpe ke sala banfunguna, mpe ke baka kidimbu, mpe beto ke kwisa na autel mpe ke balula ba-page ya malu-malu, kasi nionso na mpamba. Na yina, na ntangu ke landa muntu mosi ke kwisa na nzila ya beto to kima mosi, kudasuka yina ya ntama ke vutuka

diaka. Ntangu nionso beto ke kotaka na mpasi to kima mosi, ya ke salama diaka.

⁶⁷ Kasi ya kele na kisika yina muntu lenda kwiza, na ntangu mosi, yina ke soba yandi kukondwa nsuka, samu na Seko. “Yandi yina ke kwisa na Munu, Mu ke tula yandi ve na nganda,” Yesu tubaka. Muntu lenda kwiza na Nzambi, mpe kisika ya yandi nyonso ya kusuka ya Seko me soba. Mpe muntu lenda kutana na Nzambi, mpe yandi lenda ata fioti ve kuvwanda diaka mutindu mosi. Beno lenda kutana na Nzambi ve mpe kuvwanda kaka muntu yina beno vwandaka. Kana beno bika Yandi, beno ke vwanda muntu ya kulutila yimbi kulutila yina beno vwandaka ntete. Kana beno ndima Yandi, beno kele na Luzingu ya Kukonda nsuka, mpe Yandi ke vumbula beno na kilumbu ya nsuka, na nzila ya nsilulu ya Yandi.

⁶⁸ Ya vwandaka na ntangu yina muntu mosi ba bokilaka Abraham, yina katukaka yinsi ya ba-Chaldéen, mpe yandi kwendaka zinga na mbanza ya Ur. Mpe yandi vwandaka kaka muntu, muntu ya mbote. Ya lendaka vwanda, mu banza yandi vwanda . . . Tata ya yandi mu banza vwanda sambila biteki, samu bawu katukaka na Babylone. Mpe yandi vwandaka kaka muntu mutindu bantu nionso, mpe yandi vwandaka kuma kiboba. Yandi vwandaka na bamvula makumi sambwadi na tanu, mpe kento ya yandi vwandaka na bamvula makumi sambanu na tanu.

⁶⁹ Mpe Abraham, kilumbu mosi, ntangu mu banza yandi vwandaka kuna na kilanga, na kuzomba to nionso yina yandi vwandaka sala, yandi vwandaka lokota bambuta, konso kusalu yina ya lendaka vwanda, yandi kutanaka na Nzambi. Mpe kubanda ntangu yina, yandi sobaka. Yandi lendaka bokila bima yina vwandaka ve, mutindu ti ya vwandaka, samu ti yandi kutanaka na Nzambi. Yandi zabaka muniti mpe ngunga yina yandi kutanaka na Nzambi. Yawu sobaka yandi. Mpe Nzambi bokilaka yandi na kuvwanda tata ya bayinsi mingi. Mpe yandi kwikilaka na Nzambi mpe kwikilaka na nsilulu ya Yandi, samu yandi kutanaka na Nzambi. Bamvula makumi zole na tanu na ntwala, ba vwandaka solula, ba vwandaka meka na kuvweza yandi, kutuba na yandi ti yandi kwikilaka kima yina vwandaka mbote ve. Kasi Biblia ke tuba, “Yandi kumaka ngolo mingi ntangu nyonso, na kupesaka lukumu na Nzambi.” Samu, yandi zabaka ti Nzambi fwana zitisa nsilulu yango.

⁷⁰ Yina ke ntangu muntu mosi ke kutana na Nzambi. Ya ke soba mayele ya yandi. Ya ke pesaka yandi mayele ya kulutila nene. Mutindu mu vwandaka tuba na nkokila yina, muntu ya kimuntu kele kaka na ba-sense tanu. Kasi, mukwikidi, ntangu yandi ke kutana na Nzambi, yandi ke kuzwa kima ya luswaswanu. Ya kele dibanza ya nene yina ke zangula yandi na zulu ya bivudi. Ya ke sala ti yandi kukwikila bima yina lendaka salama ve. Yandi ke

kwikila kaka ti yawu ke salama, samu ti Nzambi tubaka mutindu yina. Ntangu muntu ke kutana na Nzambi, kima mosi ke salama.

⁷¹ Ya vwandaka na ntangu yina muntu vwandaka me longuka ndwenga nionso, théologie nionso ya Ndinga ya Nzambi. Yandi zabaka Yawu mbote-mbote. Yandi longakaka mingi. Yandi vwandaka na ba-diplôme nionso. Yandi vwandaka na mayele mingi ti yandi lendaka kulongisa bantu ya Égypte mpe milongisi ya bawu. Yandi zabaka yawu nyonso, mbote-mbote. Kasi na yayi, koyi-koyi yina vwandaka tina, kwendaka kuna na manima ya ntoto ya kuyuma mpe vwandaka kudisa mameme ya nzenza. Kasi kuna kwizaka ntangu yina Nzambi kutanaka na yandi kuna, na mulaka ya tiya. Mpe kubanda ntangu yina, Moise sobaka, samu yandi kutanaka na Nzambi na mulaka ya tiya. Mpe mbunzu na mbunzu na Nzambi, yandi lendaka diaka ve kuvwanda mutindu mosi.

⁷² Ntangu bakala to kento...Mu ke kipe ve lutangu ya bansilulu yina beno ke sala, to ba-page ya malu-malu yina beno ke balula. Tii kuna beno ke kutana na Nzambi, beno lenda soba ve. Kasi ntangu beno ke kutana na Nzambi, na yina beno ke soba kukonda nsuka.

⁷³ Yina sobaka ve kaka Moise. Yawu sobaka Israel. Yawu sobaka Egypte. Yawu sobaka yinza na ntangu yina, samu muntu mosi kutanaka na Nzambi mpe bakaka Yandi na Ndinga na Yandi.

⁷⁴ Yina beto ke na yawu nsatu bubu yayi kele muntu yina ke kutana na Nzambi, mbunzu na mbunzu, mpe kuzonza na Yandi, diambu. Ntangu bantu ke kutana na Nzambi, bima ke soba. Ya kieleka. Yina kele mutindu mosi kaka beto lenda kuzwa bima.

⁷⁵ Mpe kubanda ntangu yina, Moise muntu ya koyi-koyi, Moise muntu yina vwandaka kima, yandi sobaka. Mpe kubanda ntangu yina, yandi kumaka kisadi ya Mfumu. Yawu ke salaka kaka mutindu yina. Ntangu muntu ke kutana na Nzambi, bima ke soba.

⁷⁶ Ya vwandaka na mwana-kento mosi ya ntwenia, na zulu ya bamvula kumi na nana ve, to mu banza ya bamvula yina ve, yina kwisaka na dibulu ya masa na suka mosi, samu na kubaka kantini ya masa, kuna na Nazareth. Yandi vwandaka mwana-kento ya ntwenia ya mbote. Yandi kwikilaka. Yandi vwandaka na lukwikilu. Kasi, na suka yina, yandi kutanaka na Nzambi. Mpe Nzambi tubaka na yandi kima mosi, mpe yandi kwikilaka yawu. Mpe yawu sobaka luzingu ya muvimba ya kento yayi, mpe salaka ti yandi kufwa ve. Nkumbu ya yandi vwandaka Marie, mama ya Mfumu ya beto Yesu. Mama yayi ya fioti vwandaka kaka ntwenia ya kento mutindu bakento nionso, kasi yandi kutanaka na Nzambi. Mpe kubanda ntangu yina, kima mosi salamaka. Ya kieleka.

⁷⁷ Ya vwandaka na muntu mosi na nkumbu ya Pierre, mulobi mbisi ya kiboba ya ngolo, kaka ngolo kulutila mingi. Mpe yandi vwandaka kaka muntu ya mambu ya ngolo. Samu, awa mwa ntangu fioti me luta, mu monaka nsaka, ba bokilaka “Mulobi-mbisi ya Nene.” Mu banzaka ti ya vwandaka disolo ya mbote ya Pierre, samu ti yandi vwandaka muntu ya nene ya ngolo. Yandi kipaka kima mosi ve. Yandi vwandaka kwikila kima na mpasi. Kasi, kilumbu mosi, yandi kutanaka na Nzambi. Mpe kubanda ntangu yina, yandi sobaka. Kubanda ntangu yina, yandi kumaka ntumwa ya Mfumu Yesu Klisto.

⁷⁸ Mutindu Mpangi David duPlessis vwandaka tuba na beto mwa ntangu fioti me luta, samu na Saul ya Tarse, muntu vwanda kufwa bantu, yina vwandaka simba kazaka ya bantu yina ke kufwaka bantu, ti, mpe yina pesaka kimbangi, mpe pesaka kimbangi samu na lufwa ya mbandi Étienne. Yandi vwandaka na mikanda na posi ya yandi, samu na kukwenda na mfumu ya mbuta ya mabuundu, mpe kukanga bantu yina vwandaka sala makelele mingi, kuboka, mpe kukumisa Nzambi. Yandi vwandaka muntu ya nene na ntwala ya ba-Pharisien. Yandi vwandaka Pharisien ya ba-Pharisien. Kasi, kilumbu mosi, yandi vwandaka kwenda na Damas, mpe yandi kutanaka na Nzambi. Nsemo semaka pene-pene ya yandi. Mpe kubanda ntangu yina, yandi vwandaka diaka ve Saul ya Tarse. Kasi yandi vwandaka Paul, ya kukikulumusya, ya lembami, samu ti yandi kutanaka na Nzambi, mpe Yawu sobaka yandi.

⁷⁹ Ya vwandaka na kimbevo ya wazi yina vwandaka na mwelo. Bankisi nionso vwandaka lenda ve na kubelula yandi. Yandi vwandaka na bamputa ya mubisu tii yandi lendaka kuzangula yawu, diaka ve. Mpe makulu ya yandi, na mpasi yandi lendaka benda yawu. Diambu ya yandi vwandaka ya kukondwa kivuvu. Kasi yandi kutanaka na Nzambi, kilumbu mosi, na kubasika na mwelo. Mpe yandi fukamaka mpe sambilaka, mpe tubaka, “Kana Nge me zola, Nge lenda vedisa munu.”

⁸⁰ Mpe Yandi tubaka, “Mu ke sala yawu. Vwanda ya kuvedila.” Mpe kubanda ntangu yina, yandi vwandaka diaka ve na kimbevo ya wazi, samu yandi kutanaka na Nzambi.

⁸¹ Ya vwandaka na bakala mosi ya mpofo vwandaka ya kuvwanda na lweka ya nzila. Mpe yandi lendaka ve kuswasikisa kilumbu na mpimpa. Ya vwandaka ve na kima yina lendaka sadisa yandi. Kilumbu mosi, Muntu mosi basikaka na mbanza ya Jéricho, mpe ntangu yandi kutanaka na Nzambi; mpe kubanda ntangu yina, yandi lendaka mona. Yandi monaka. Nsemo semaka na meso ya yandi, mpe yandi lendaka kumona dyaka. Samu ti, kubanda ntangu yina, ntangu yandi kukutanaka na Yesu, yandi vwandaka muntu ya kuswaswana. Yandi monaka.

Ntangu muntu me kutana na Nzambi, kima mosi ke salama ya kieleka.

⁸² Ya vwandaka na ntwenya mosi ya bakala, kilumbu mosi; kukondwa ntembe, mwisi-ntoto ya mbote ya yinsi, kasi yandi vwandaka kubwa ngambu. Mpe yandi vwandaka na kimbevo ya ngolo mingi ti boloko lendaka ve kusimba yandi. Mpe bawu kangaka yandi na miniololo. Mpe yandi vwandaka na nkonga ya bampeve ya yimbi, na kati ya yandi, tii kuna yandi lendaka buka miniololo mpe kuvwanda na kimpwanza. Mpe bampeve ya yimbi vwandaka nata yandi na maziami, kisika yandi vwandaka zinga. Mpe yandi vwandaka katula ba-plaque, yandi kumaka na nganzi mingi ti, yandi lendaka zenga nzutu ya yandi mosi. Oh, yandi vwandaka muntu mosi ya boma. Ntangu bangambu yina vwandaka bika yandi, na ntembe ve ti yandi vwandaka banza, “Yinki mu ke sala awa?” Mpe kaka na ntangu yina, bampeve ya yimbi vwandaka kwisa na yandi diaka, mpe vwandaka zenga yandi mpe vwandaka pasula yandi. Kasi, kilumbu mosi, yandi kutanaka na Yesu. Mpe kubanda ntangu yina, kilawu ya Gadara vutulaka mabanza ya yandi, yandi lwataka bilele ya yandi, yandi vwandaka na makulu ya Yandi. Yandi lendaka vutuka na yinzo, mutindu muntu ya mbote. Yandi lendaka vutuka na civilisation. Yandi lendaka vutuka na bankundi ya yandi ya luzolo, mpe lendaka tuba, “Kubanda ntangu yina, mu me soba.” Yinga.

⁸³ Ya vwandaka kilumbu mosi, kuna na Calvaire, ntangu Nzambi na lufwa kutanaka, mbunzu na mbunzu, ntangu Luzingu mpe lufwa kutanaka kintwadi. Kasi ya kele ntangu Luzingu, Klisto, botulaka ntunga ya lufwa. Mpe kubanda ntangu yina, lufwa ke vwandaka ve na ntunga. Mu ke na kiese mingi samu na yawu. Nzambi! Lufwa mpe Nzambi kutanaka, kintwadi. Lufwa vwandaka ve mutindu mosi. Yawu kele diaka ve na ntunga ntangu yayi. Mukwikidi ya Muklisto lenda kwisa na ntwala ya yandi mpe kutuba, “O lufwa, wapi ntunga ya nge? Ntoni, wapi lunungu ya nge?” Samu na yinki? Bawu zole kutanaka na Nzambi. Bawu vwandaka ve mutindu mosi kubanda ntangu yina.

⁸⁴ Muntu ve lenda vwanda mutindu mosi, kima mosi ve lenda vwanda mutindu mosi, ntangu yawu ke kutana na Nzambi. Beno ke vwanda ata fioti ve mutindu mosi.

⁸⁵ Mu lenda bambuka moyo na ntangu mu vwandaka ya kulala awa na mbeto ya lupitalu. Badokotolo pesaka munu bamuniti tatu samu na kuzinga. Ntima ya munu vwandaka bula, bambala kumi na sambwadi na minuti. Mu kutanaka na Nzambi. Kubanda ntangu yina, mu vwandaka ve mutindu mosi. Kima mosi salamaka na munu. Muntu mosi ve lendaka tuba na munu mambu yankaka. Bill Branham kufwaka. Mu kutanaka na Nzambi, mpe Kima mosi kwisaka na kati ya munu. Mu me vwandaka diaka ve mutindu mosi kubanda muniti yina mu kutanaka na Yandi. Yandi sobaka munu. Yandi salaka munu kima ya luswaswanu. Ya vwandaka ve diambu ya kusala nsilulu ya Mvula ya Malu-malu, kasi mu kutanaka na Nzambi.

⁸⁶ Babakala mpe bakento, ntangu beno ke kutana na Nzambi, beno ke soba. Beto ke sala bansilulu ya Mvula ya Malu-malu na nkokila yayi; kuvutuka mbasi na suka, samu na kubuka bawu; kilumbu yina ke landa, samu na kubuka bawu. Kasi yina beto zola kusala, kele ve nsilulu ya Mvula ya Malu-malu, kasi beto ke na nsatu ya kukutana na Nzambi, mpe kuzwa Luzingu ya Kukonda nsuka, kubutuka na Mpeve ya Yandi.

⁸⁷ Yandi vwandaka kiboba ya bakala, kilumbu mosi, mpe yandi lendaka ve kubaka lukanu ya yandi. Diabulu vwandaka bula yandi samu na kupekisa yandi. Kilumbu mosi, kuna na kilanga, yandi fukamaka samu na kusambila. Na ntangu yandi vwandaka sambila, yandi kunaka kitini ya yinti. Yandi tubaka, “Bika ti yayi kuvwanda lubambuku. Satana, kana nge kwisa diaka na munu, mu ke talisa nge kitini ya yinti yayi. Mpe mu ke tuba na nge ti kaka awa mu kutanaka na Nzambi, mpe nionso sukaka kubanda awa.” Yawu yina beto zola, mu banza kitini ya yinti ve na kati ya kilanga, kasi kisika mosi kuna, kinsweki ya kivinga mosi, kisika mosi. Ve . . .

⁸⁸ Oh, na nkokila yayi, ya ke vwanda na bankama ya bansilulu yina ba ke sala, mafunda ya yawu me salama. Mpe mvula ke kwisa beto ke sala yawu nionso, diaka. Beto ke tuba, “Beto ke bika luvunu. Beto ke bika kusala *yayi*. Mpe beto ke bika kudasuka ya beto. Beto ke sala kulutila mingi samu na Nzambi. Beto ke sala *yayi, to yina, to yankaka,*” kaka samu na kuzaba, ya kele mpamba.

⁸⁹ Kasi yina muntu fwana kusala, na nkokila yayi, kele kukwisa kukutana na Nzambi. Mpe kubanda ntangu yina, yandi kele kivangu yina me soba. Alleluia! Oh, mu ke zola kutuba yawu na mutindu mu ke kwikila yawu. Kasi ntangu muntu ke kutana na Nzambi, yandi ke soba, na muniti yina, bilumbu ya yandi nionso. Ata mbala mosi ve ti yandi ke vwanda mutindu mosi, samu ti yandi kele na Luzingu ya Kukonda nsuka. Yandi kele kivangu ya malu-malu. Bima ya ntama me luta, mpe bima nyonso me kuma ya malu-malu samu na yandi. Yandi ke monana ya malu-malu.

⁹⁰ Mbevo lenda kwisa na ntwala ya Nzambi, na ntangu badokotolo me tuba, “Yandi ke kufwa.” Kasi yandi lenda tambula na ntwala ya Nzambi, mpe kutubila diambu ya yandi. Mpe yandi ke basika, muntu ya kuswaswana, mpe kubanda ntangu yina.

⁹¹ Oh, mu ke bambuka moyo na Senateur Upshaw, yina vwandaka na kiti ya bambevo bamvula makumi sambanu na sambanu. Na nkokila yina, kuna na Californie, ntangu Mpeve-Santu kulumukaka, mpe bandaka na kutuba, yandi kutanaka na Nzambi. Mpe kubanda na ntangu yina, yandi lendaka tambula kukondwa ba-béquille ya yandi.

⁹² Mu me monaka ntangu yina cancer vwandaka kudia bantu ya kulala kuna, ya bikanaka kaka kivudi ya bawu. Mpe

badokotolo vwandaka luta kuna mpe ke tuba, “Bawu me kufwa.” Bankundi ya bawu ya luzolo ke vukana, samu na kutuba bampova ya nsuka yina ba lendaka tuba, na bawu, samu na kukindisa bawu. Kasi bawu kutanaka na Nzambi, mpe, kubanda ntangu yina, bawu sobaka. Bawu zingaka mutindu yankaka.

⁹³ Mu lenda mona kento ya mansoni, kuna na bala-bala. Mu lenda mona munwi-malafu, kuna na nzila. Mu lenda mona muntu ya luvunu, kuna na yinzo-Nzambi. Bantu yina ya mutindu na mutindu, konso Mvula ya Malu-malu, ba ke balula matiti ya malu-malu, mpe ke meka na kusala kima ya luswaswanu, ba ke meka na kusala bafunguna mpe nionso yina. Bika bawu kutana na Nzambi, na ntangu mosi, mpe kubanda ntangu yina.

⁹⁴ Yesu longaka na bawu kubanda ntangu yina, bayina vwandaka na bizunga ya kivudi ya lufwa.

⁹⁵ Mpe mu ke tuba, na nkokila yayi, kana muntu zola kuzwa nsobolo ya kieleka kukwisa na yandi, bika yandi kwisa kutana na Nzambi mbunzu na mbunzu, mpe kukutana na Yandi na ntangu mosi, na yina yandi lenda tuba, “Kubanda ntangu yina, kubanda ntangu yina, mu vwandaka muntu ya kusoba. Mu zaba na nzila ya nzingulu.”

⁹⁶ Na mwa ntangu fioti, dibuundu ke vukana awa pene-pene ya autel. Beno ke kaba baluzingu ya beno, diaka. Beno ke pesa bima, mpe kutula bima na zulu ya autel. Mpangi-bakala, bika mu pesa beno dilongi. Kana beno me kutanaka ntete ve na Nzambi, mbunzu na mbunzu, bika mu tuba na beno kima mosi. Beno vwanda na autel yayi. Beno vwanda kaka kuna tii kuna beno ke kutana na Nzambi, na yina beno lenda songa musapi na mpimpa yayi ya Mvula ya Malu-malu. Ve, mpe kutuba, “Mu balulaka page ya malu-malu. Mu salaka nsilulu ya malu-malu.” Kasi, “Kubanda ntangu yina, mu kutanaka na Nzambi. Mpe luzingu sobaka, mpe bima vwandaka ya luswaswanu. Mpe bima nionso kukuma ya malu-malu, samu na munu, diaka, kubanda ntangu yina,” ntangu yina beno ke kutana na Nzambi.

⁹⁷ Ya kele ve, kukutana na Mvula ya Malu-malu. Beto ke kutana na yawu, na baminuti fyoti, na manima ya mwa ntangu fioti, pene ya bangunga zole na ndambu, mu banza, ya lendaka vwanda fioti na yina, beto ke kutana na Mvula Ya Malu-malu, mbunzu na mbunzu. Beto ke kutana na yawu na bansilulu. Beto ke kutana na yawu na bandefi. Beto ke kutana na yawu na dikani ya mbote. Beto ke kutana na yawu, na kutubaka, “Beto ke meka na kubalula page ya malu-malu. Beto ke meka na kusala luswaswanu.” Ya kele mbote mingi. Mu ke sepela na yawu.

⁹⁸ Kasi mpangi, ata mbala mosi ve ti ya ke vwanda Kukonda nsuka tii beno ke kutana na Nzambi, ntete. Ntangu beno ke kutana na Nzambi, ntete, mpe, kubanda ntangu yina, mambu nionso ke vwanda ya luswaswanu.

Beto sambila na yina beto ke kulumusa bayintu ya beto.

⁹⁹ Mfumu Yesu, Mwana ya Nzambi, mu ke bambuka moyo ntangu mu kutanaka na Nge, Mfumu. Mu ke bambuka moyo, muntu ya mawa mu vwandaka, yina vwandaka zinga luzingu ya kuvedila, ve kubasika bisika nionso, kunwa malafu, to bansaka ya mbongo, to kunwa makaya, to nionso yina. Kasi mu zabaka, Mfumu, ntangu lufwa kotaka na muyibi kuna na lupitalu, mwa bamvula makumi zole me luta, kima mosi vwandaka kondwa na luzingu ya munu. Mu kutanaka na Nzambi, mpe kubanda ntangu yina. Kubanda ntangu yina, Mfumu, mu ke mekaka na kusadila Nge. Luzingu ya munu me sobaka mpe bima nionso me kumaka ya kuswaswana. Mu ke na kiese ti mu me kutana na Nge, Mfumu. Mpe na nkokila yayi, mu ke kutana na Mvula ya Malu-malu, mu ke na kiese na kutuba ti mu lenda kutana na yawu na Mpeve ya Nzambi ya moyo na kati ya ntima ya munu.

¹⁰⁰ Pesa beto banzingulu, Mfumu. Pesa beto mambote mpe mawa ya Nge. Lemvokila beto masumu ya beto. Mpe bika beto kuzinga na mvula yayi ke na kwisa, O Mfumu Nzambi, na nzingilu mosi, ti beto me kutana na Nge mpe baluzingu ya beto me soba. Pesa yawu, Mfumu. Lemvokila beto banzimbani ya beto. Tula na kati ya beto Mpeve-Santu ya Nge. Twadisa beto mpe tambusa beto.

¹⁰¹ Tata Nzambi, awa kele mvula 1960, ke kutana na munu. Mpe kele na bantangu ya mbote samu na ndandani ya balukutakanu na yinza ya muvimba, kisika ya ke monana ti makumi ya bamafunda ya bamafunda, mpe bamafunda mpe bamafunda ya mimpani ya kieleka, basambidi biteki, mpe nionso yina, lendaka kwisa na Nge. O Mfumu Nzambi, na Mpeve ya Nge na kati ya ntima ya munu, mu kele na ntuala ya autel ya Nge, na nkokila yayi, mpe na ntuala ya Nge, mpe mu ke tuba, “Sadisa munu, O Nzambi. Ntima ya munu kele ya kupela na nsayi. Mu zola Nge, Mfumu. Mu ke kukipesa munu mosi na Nge, na kusalu. Twadisa munu na kisika nionso Nge zola twadisa munu. Tinda munu konso kisika yina Nge zola tinda munu, Mfumu. Tuba kaka, mpe mu ke kwenda.”

¹⁰² Sakumuna dibuundu ya munu. Sakumuna Mpangi Neville. Sakumuna bantu nionso awa, banzenza na kati ya beto. Mpe ba-pasteur yayi yina ke tuba, mosi na manima yankaka, na kati ya nkokila yayi, mu ke sambila, Nzambi, ti Nge ke sakumuna ministere ya bawu. Sakumuna Mpangi Neville. Sakumuna Mpangi Junie Jackson. Mpangi Beeler, milongi nionso yayi yankaka, sakumuna bawu, Tata. Pesa beto mvula ya nene na mvula 1960.


¹⁰³ Beto, Mfumu, yina zaba ti beto me kutana na Nge, mbunzu na mbunzu, mpe kuzaba yinki ya zola kutuba kubutuka mbala zole na Mpeve ya Nge, pesa beto lemvo ya Nge ya Kukonda

nsuka, samu na kusadila Nge. Na Nkumbu ya Yesu beto ke sambila. Amen.

¹⁰⁴ Beno zola Yandi? [Dibuundu me tuba, “Amen.”—Mu.] Mvula 1960, beno bika ve yawu kuvwanda, ti, “Mu balulaka page ya malu-malu.” Beno bika yawu vwanda ve, ti, “Mu ke meka na kubanda luzingu ya malu-malu.” Kasi bika yawu kuvwanda, ti, “Mu kutanaka na Nzambi, mpe kubanda ntangu yina, mu vwanda na ngemba yina me luta mayele nionso. Mu wandaka na kiese yina ba lendaka kuzonzila ve, mpe ya kifuluka na nkembo. Mu wandaka na kiese. Ata ti lufwa ke kwisa na munu, mu ke vwanda na maboko ya Nzambi, muniti mosi na manima ya pema ya munu ya nsuka. Ata ti yina ke kwisa to ke salama!”

¹⁰⁵ Ti bawu mwangisa yawu, Lumingu na nkokila, kana bawu zola. Kana bawu zola, bombe ke mwangana ve ti beto ke vwanda na Nkembo na Yandi. Amen. Kima mosi ve lendaka sala beto yimbi. Alleluia!

¹⁰⁶ Mu kele na kyese ti mu kutanaka na Nzambi. Mu kele na kyese mingi ti mu lenda tuba, “Katuka ntangu yina.” Kutuba kieleka ntangu yawu me salama! “Ntangu mu kutanaka na Nzambi, kima mosi salamaka na munu. Mu sobaka, kubanda muniti yina. Mu sobaka, kubanda ntangu yina.” Mu ke na kiese na kuvwanda na nzila yayi, na nkokila yayi, mutindu kimbangi samu na Nkembo mpe Ngolo ya Nzambi. Mwa kima mosi ya mpamba awa, mpe Nzambi kulumukaka kuna mpe pesaka munu lemvo ya Yandi, mpe vulusaka munu, mpe belusaka munu, mpe fulusaka munu na Mpeve ya Yandi. Mpe bika mu longa Nsangu ya Yandi ya mbote, yina kele lukumu ya kulutila nene na yinza. Kubanda ntangu yina, tii na ntangu yayi, mu ke wandaka ata fioti ve na kiadi. Kasi mu ke vutulaka matondo, bilumbu nyonso yayi, mpe ke vwanda, na kati ya Seko nyonso, ti mu me kutana na Nzambi.

Nzambi sakumuna beno. Mbote mingi, Mpangi Neville. 

MPE KUBANDA NTANGU YINA KNG59-1231
(And From That Time)

Nsangu yayi ya Mpangi William Marrion Branham, kulongamaka na Kingelesi, na mazono ya Mvula ya Malu-malu, na Kilumbu ya yiya na nkokila, na kilumbu ya 31 ya Ngonda ya kumi na zole, na mvula 1959, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org